

Govor supervizora za Brčko na središnjoj proslavi povodom šeste obljetnice Brčko Distrikta

Dragi gosti, prijatelji i Brčaci,

Zašto su važne obljetnice?

One nas okupe kako bismo se prisjetili događaja kojima pridajemo važnost – rođenje čovjeka, institucije, nacije, ili u ovom slučaju – Brčko Distrikta.

Sjetite se kako je Brčko izgledalo na kraju rata?

Pogledajte ga sada! Život se vratio u Brčko. To se moglo osjetiti na predivnom dječijem festivalu “Dječija mašta može svašta” koji je u nedjelju uvečer održan u istoj ovoj sali.

Kazano na razne načine, oduvijek postoji izreka: dobijamo onoliko koliko dajemo.

Vi, ljudi Brčkog, ste dali mnogo! Rezultati su svuda oko nas. Sigurna sam da imate još toga da date i molim vas da tako nastavite.

Moj prethodnik, ambasador Henry Clarke, danas je sa nama i ja bih željela da mu javno odam priznanje kao arhitektu jedinstvenog i uspješnog programa privatizacije u Distriktu.

Želim vam pročitati poruku prvog supervizora, ambasadora Farranda, koji nije bio u mogućnosti da dođe danas, ali poručuje:

“Dopustite mi, ovom svečanom prigodom, uputiti svoje najtoplije pozdrave i čestitke dobrim građanima Brčko Distrikta i njegovoj Vladi.

Na isti ovaj dan prije šest godina, imao sam čast proglasiti Brčko Distrikt Bosne i Hercegovine realnošću sukladnu Dejtonskom mirovnom sporazumu i njegovom dopunskom dokumentu, Konačnoj odluci Arbitražnog tribunala za Brčko.

To je bio trenutak za pamćenje...

Međutim, najvažniji sudionici toga dana ste bili vi, dobri ljudi Brčkog. Svojom hrabrošću i opredjeljenjem za mir pokazali ste da ste voljni da poduzmete rizik ispunjenja Konačne odluke i njenog obećanja boljeg života za vašu djecu.”

I ja danas tako mislim.

Narodi Balkana moraju živjeti zajedno, kao i svi mi u svijetu – muslimani, hrišćani, jevreji, ateisti, budisti i drugi – na ovoj lijepoj planeti Zemlji.

Moramo graditi svijet u kojem živimo, bilo da je to na lokalnoj, regionalnoj, državnoj ili globalnoj razini. To radimo sada!

Danas, osmi ozujka, željela bih odati priznanje posebnom i velikom doprinosu koji su svojim aktivnostima dale žene svih nacionalnosti iz Brčkog.

One su bile prve koje su otvorile svoja srca i pružile ruke jedne drugima nakon rata. Ako im damo važniju ulogu koja im pripada, Distrikt će ostvariti svoje mogućnosti.

Također bih željela odati priznanje poduzetnicima i privrednicima koji su “motor” revitalizacije privrede. Mi u Distriktu vjerujemo da će oni otvarati nova radna mjesta.

Oni su ti koji ostvaruju prihode za fiskalnu samoodrživost Brčkog. Vlada samo treba da stvori prave uvjete – privrednici će uraditi ostalo.

Brčko Distrikt je još uvijek veoma mlad, ali može biti primjer i inspiracija. Potrebni su mu prihvatanje, razumijevanje i potpora za napredak.